

Fa il far musica intelligent?

■ (cp) Radiotelevision Svizra Rumantscha preschenta il film «Fa far musica intelligent – Macht Musik intelligent?» da Menga Huonder-Jenny. Dumengia, ils 6 da schaner 2013 a las 17.25 en l'emission «Contrasts» sin SRF 1. Betg pir dapi la votaziun dals 23 da settember 2012 tar la promozion da musica da giuventetgna vegn discutà da l'impurtanza da l'instrucziun da musica per uffants. La musica vegn considerata sco part preziosa da la cultura svizra. Blers manejan schizunt che la musica prevegna a la violenza da giuventetgna, stimuleschia il svilup da l'uffant e promovia l'integraziun da la populaziun estra en Svizra. Ma po er l'intelligenza vegnir augmentada cun sunar in instrument? Sunar è numnadain in fatg complex: Ins sto exercitar abilitads sensoricas e motoricas per dumagnar melodia, armonia e ritmus.

Il film interquera questa dumonda ensemen cun la neuropsicologa *Ladina Bezzola*. Ella perscrutescha a l'Universitad da Turitg e collavura cun *Lutz Jäncke* che ha sveglià grond interess cun ses cudesch «Macht Musik schlau?». *Ladina Bezzola* fa differents tests cun ils quatter protagonistas dal film, *Lea, Altin, Pedro e Milena* e declera lura co che la musica e co che far musica effectueschan en il tscharvè.

Ils geniturs dad Altin vegnan da l'Albania, quels da Pedro dal Portugal. Altin e Pedro fan «musica en classa». Quai è in project singular per il Grischun. En la terza e quarta classa da la scola primara a Puntraschigna emprendan mintga uffant in instrument ad artg e l'entira classa fa duas giadas ad emna ensemen musica. Quest'idea vegn da



Lea Lazzarini e Milena Hug.

MAD

l'America ed è vegnida renumada entras l'orchester sinfonic da giuvenils venezolan Simón Bolívar.

Il film purtretescha era duas mattas ch'èn gia vegnidas lunsch cun lur dusesch e quattordesch onns. Las flautistas *Lea Lazzarini* da Samedan e *Milena Hug* da Bever sunan uschè bain ch'ellas pon prender part cun lur duo da flautas «Las Striettas» da la concorrenza da musica da giuventetgna svizra a Sarnen. Accumpagnadas e preparadas per la concorrenza vegnan ellas da lur scolasta da musica *Emilia Zangger*. Il team che fa il film è preschent live durant

ch'ellas sunan avant ils giurors ed era durant ils discurs d'evaluaziun. Quai è ina excepziun perquai ch'i na dastga normalmain betg vegnir filmà durant la concorrenza.

Il film da *Menga Huonder-Jenny* è fitg adattà per uffants e giuvenils malgrà il tema complex. Quai è il merit da *Ladina Bezzola* che chapescha da declerar bain ed enclegentaivel il process en il tscharvè. Er tranter las parts scientificas vegn l'aspectatur divertì. Las intervistas cun ils giuvenils e lur scolasts èn interessantas ed i fa bler plaschair da tadlar e vesair ils uffants che fan musica.

Premiera dal film

L'emprima visiun publica dal film ha lieu ils 5 da schaner 2013 a las 18.00 en il center da congress Rondo a Puntraschigna. L'occurrentza è publica e vegn organisada da Menga Huonder. L'entrada è gratuita.

En ils programs da la SRG SSR vegn il film mussà sco suonda:
dumengia, ils 06-01-2013, 17.25 sin SRF 1
Repetiziuns:
mesemna, ils 09-01-2013, 08.30, 09.30, 10.30, 12.50 sin SRF info
gievgia, ils 10-01-2013, 10.55 sin SRF info
sonda, ils 12-01-13, 17.10 sin SRF 1